



UNIVERSITÄTS-
BIBLIOTHEK
PADERBORN

Universitätsbibliothek Paderborn

Natales Sanctorvm Belgii, & eorundem Chronica Recapitulatio

Molanus, Johannes

Dvaci, 1616

Vigesima octava Octobris.

urn:nbn:de:hbz:466:1-9477

ecclesia Tungrensi. Sed inde est nono Calendas Martij, per Brunonem episcopum, fratrem Ottonis Imperatoris translatus Coloniam, ad sanctam Cæciliam.

Cap. 61.

Memorable est quod scribit in gloriam martyrum Gregorius Turonensis, Ebergisilum nostrum, dum validis doloribus medij capitis quateretur, diaconum misisse pro pulvere ad puteum martyrum Thebæorum: & exinde cum caput attingisset, dolore omni liberatum esse. Recensetur etiam inter episcopos Tungrensis diœcesis, eo quod Tungris fidei calore inflammatus intrepidè prædicauerit contra fœtorem idololatriæ. Est autem Tungrorum oppidum antiquitatis memoria celebre in territorio Leodiensi sub dominio episcopi. Historiam vitæ & translationis edidit Surius, tomo quinto.

Vigesima octaua Octobris.

De sancto Dodone confessore.

Ex historia manu-scripta Lobijs ac alibi, & rescripto patrum Lobiensium.

FAniæ, depositio beati DODONIS monachi, discipuli S. Vrsuari episcopi. Qui in pago Lomacensi, in villa quæ dicitur Vallis, religiosos habuit parentes, à quibus ad sanctum Vrsuarum Lobiam delatus est vt sacri baptismatis vnda purificaretur, atque vt proprius eius filius, in Dei obsequio educaretur. Fultus igitur superni regis præsidio, & beati Vrsuari salutifero animatus hortatu, iam prouectior omnem suæ hæreditatis possessionem, beato principi Apostolorum dele-
gavit, 12

gavit, in monasterio quod ex nomine fluvij secus illud decurrentis Waslerus est nuncupatum. Cui etiam monasterio S. Landelinus & Vrsmarus ipsum præfecerunt. Postea relicto onere regiminis, vicino in loco cellulam extruxit: in qua permissu pij patris Vrsmari contemplationi deditus, deposito onere fragilitatis feliciter in pace quieuit. Cùm autem multis prodentibus miraculis, nomen eius apud multos innotuerat, Dodilo Cameraensis episcopus, inito consilio cum suis archidiaconis, & cæteris commanipularibus, membra sancta congruo honore deferti Waslare ad S. Petri monasterium iussit. Et in illa translatione mulier quæ brachia dissoluta ori admovere non poterat, cupiuit ea perfundi aqua, qua sancti membra à sacerdotibus abluta fuerant, & ilico sanitati est restituta. Post multa autem annorum curricula monitus est per visionem Leutbertus loci prouisor, vt eum in ecclesia collapsa indecentius quiescentem, honorificentius locaret. Quod per Fulbertum episcopum fecit, & ipse pro restauratione ecclesiæ cum gestatorio pignorum villas monasterio contiguas, & pagum Brachbantensem circuit, Deo etiam miracula aliquot in itineratione ad sancti sui honorem operante. Fuit autem Waslerum monasterium in silua Fania versus Theoraciam, sed prorsus dirutum est. Vnde corpus confessoris modo quiescit in Prioratu Lobienti, quid dicitur *Maustier en Faigne*, monasterium in Fania. Obijt in die sanctorum Apostolorum Simonis & Iudæ, sed transfertur in diem sequentem.

Verisimile est autem Vuaslerum non abbatiam fuisse sed Prioratum Lobio subiectum. Non enim pingitur sanctus Dodo cum baculo pastorali, vt ceteri sancti abbates.